



Fasnacht 2010

Echo vom Gamsbärg

Ke Zipfl off öserne Gipfl

In unsrer Wält, dr virtuelle
Duet ächts Erlääbe nimm vyyt zelle
Kennsch se nur no durs Internette
Vom schnäll voll Easy umme jette
D Wält, wo per Street View hit entdeggsch
Bequäm, ohni ass di beweggsch
Wo, wenn de in dr Dom. Rep. hoggsch
Kai Karte schrybsch, nur on-line bloggsch
Und s Laagerfyyr schyynts, das vo hit
S Facebook syg – doch das wermt nit
E Wält, wo mänge stressbloggt murt
Und trotdäm high Speed umme surt.

Zmitts in de High-Tech-Unkulture
Wirbt mit Natur, mit syner pure
Hochglanz und unverfrore gräll
S aagäblig unverdorbe Appezäll
Vom Zwingli - bis zem Rotstaipass
Miech s Wandere am Säntis Spass
Wo s Ooberot als alle gfalli
Und S Echo häll vom Gamsbärg halli
Ai hälli Wält, wo d Schwyz no het
Kai Finschtere, null Minarett
Und s thront in baide Appezälle
Praggtisch uff jeder Bodewälle
Ai Baiz stramm noch dr andere
Fir s spirituelle Wandere
D Landfrauekuchi bringi frisch
Yyhaimischs fangfrisch uff e Disch
Z Hundwil servier mer Appezäller
Hund - mariniert - uff grosse Däller
Und willsch rasch frässe anstatt Faschte
Kasch raschte uff em Hoche Kaschte
Uff Bollewees griegsch, sone Gligg
E bolle Chees samt Säntisblig
Dä issisch wie en Appezäller
Nodyrlig richtig samt em Däller
Sott das dy Maage nit verdraage
So hilft (au sunschd in alle Laage)
En Alpebitter, e bewährte
Uss Appezäller Krytergärte
Wo d Buure stuur, well si s so gwehnt sinn
Dien gillere ass d Kryter scheen sinn
Die Krytli bruuchsch, mai do wirdsch zwääg
Geg Bräschte und fir d Scheenhaitspflägg
Bi Girtel- und bi Stadtneyrose
Gits schyynts in schambar hohe Dose
E Gmisch uss Dischtle, Vogelheu
Kuehmisch, Stinggwurz und Männertreu
Bi Prostata, bi Gicht und Aisse
Hilft Schmalz us Gais vo fuisse Gaisse
D Orangehut vo ryffe Fraue